



道南堂詩集子伯兄遺橐也伯兄諱琇字補山一字璩亭姿制不凡承庭訓早克負荷年十五六赴名流文社有聲尤為張先生宏翥所器重謂他日能弘遠謨者必是人也張夙稱藻鑑宗伯韓公莢初就童子試於吾禾時偶見其文遂驚歎以為海內無兩其藻鑑如此券吾伯兄宜不爽乃伯兄僅僅以歲貢生為學官終不究其設施傷哉所存詩四卷大都舟車遊歷之作衣食於奔走遊故不得已乎而以快其登臨致其憑弔俯仰今古情見乎辭讀之者又可以想其曾懷之不為貧所困也已同懷弟維鈞謹識

卷一

古體三十四首

卷二



今體五十二首

卷三

今體五十三首

卷四

今體六十二首

舊序

今天下競言詩矣然足未遍山川之勝目不窮名物之奇僅以翻剝陳腐刻露纖佻謂可以遠駕前人以是言詩可乎蓋見聞未廣不足充其學識形之聲韻必少渾涵滂蓄之致求其言近旨遠詞約意該往往難之樵李李子補山學博思沉邇年以來客吳越齊魯燕趙豫楚遊屐所至不廢咏吟所在名公鉅卿幽人韵士莫不願從之游余慕其名已久茲溯洞

庭而南過衡陽至春陵謁先濂溪先生祠而補山適在道州署遂得訂交焉補山不鄙愚陋出詩一帙命爲之序披讀數過其雄渾高古直追開元天寶若大曆以下不堪位置雖其學識兼至要由身之所歷耳目之所及旣多故出其學識寄諸歌咏自能抒性情之蘊發山川之奇無意於旨遠意該而自遠且該斯豈翻剝陳腐刻露纖佻者所可同日語哉余不善詩何足以序補山之詩但數年心儀其人今得識其面讀其詩大慰夙昔之志則予於補山交雖新而情實故也何可無言故不辭而爲之序康熙己卯七月旣望同學弟周家耀撰

余與補山交有年矣補山以家貧奔走衣食計其足跡所至兩客燕三至楚往來齊魯大梁豫章吳越之間與余曩時游

屐後先相等凡暮雨晨霜淒風冷月目之所經心思之所觸可驚可愕之事悉寓之於詩昔風雅亡而離騷作離別也騷愁也離別愁苦之言乃為言情之至者補山抱負卓犖顧鬱鬱不得志曩遊武昌值裁兵煽亂於危城中流離逃竄僅以身免去歲茶民之亂方客遊衡永間適與兵燹相際所如輒困宜其詩之窮而益工也而篇什所散失者蓋已多矣今年秋昇奉 命典試江西撤棘後補山來自楚南連牀道故相得歡甚出其詩存若干首屬余為之序因追念疇昔我兩人遊屐之相同而誌其梗概如此讀其詩嘆其才而悲其遇殆不禁感慨係之矣康熙己卯九月望日同學弟查昇題

余與補山別兩年矣今年春以詩歌視余蓋自發京邑拂叢臺度漳滏踰宛洛以抵衡湘途中登覽憑弔之作為多忼慨

悲涼言約旨遠如過羨里端木子祠三仁墓諸篇議論開闢足以發潛闡幽洵傑構也余嘗謂聲律散文鮮克兼擅杜子美長於詩而文不見推曾子固長於文而詩無可取天之賦人有限未可強也補山以文名噪兩浙其遊京師名公卿無不歎服其文今其詩復工到如此則余向者之言豈篤論與余年來放廢無聊轉徙南北與補山大略相似而轍跡所至紀遊之作不暇以為為之亦不足存讀是編既欽補山之才又自愧也同學弟錢來修

題道南堂詩集

符嘗與友人論詩謂天地間奇景勝情俱為唐宋人道盡今人即有警句不能出其範圍聽者是之令讀吾叔近製五律如草館斜橋渡花田曲水圍徑窄疑無路峰回忽有天七律

如馬踏落花紅破碎鶯啼暗柳綠中間七絕如隔岸鐘聲人
不見落花無語燕飛來遙望一枝春色好梨花小院是誰家
皆凌跨唐宋人之傑句也於此知向日所言非爲通論至若
弔古諸篇發前人所未發奇句不可枚舉符奉別詩云阿咸
不敢共論詩情見乎詞矣姪符拜書

道南堂詩集卷一

愚溪

嘉興梅會

李琇

琢亭

水本知者樂而乃名以愚緬懷名溪意弔古長嗟吁當年盛
才華功名會有途惜哉輕傾許一跌誰相扶投竄來南荒愛
此山之隅溪水清且冽徑僻無樵蘇沿流溯溪上幽鳥時招
呼有池石可壘有亭茅可誅賦詩勒溪石自誚復自娛先生
廊廟才賈志寧區區君子慎交游漸進良非迂

彭蠡湖

湖水渺無際日出辨西東廬山天外落隱見波濤中百里來
瞬息一葉如排空船頭奔巨浪船尾眠篙工洲回淺沙出千
艘拋魚置六月苦炎熱不異炮灼攻舟行那知暑蜃氣吞鴻

蒙煙波千萬頃面面帆檣通洵知宮亭神能分上下風彭蠡一名

宮亭湖有神能分風上下

浯溪

山川洵奇秀不朽因名賢道州刺史居溪名實始焉二絕中興頌一一摩崖鐫我來千載後躡屐相攀緣巉巖怪石立撩亂山花鮮高臺四望開孤亭百尺懸湘水縈其下九疑亘其前窾穴紀小石垂流命七泉惟茲三吾勝次山卜居浯溪臺曰悟臺亭曰唐亭名爲三吾亦以刺史傳祠荒塵寂寂弔古徒留連昔人不可作古木籠寒烟

謁濂溪周元公祠

洙泗不復作斯文誰仔肩先生千載後乃悟義畫先作圖啟突奧萬古開蒙顓陰陽互根柢主靜非空玄奉此一字箴羣

言皆塵詮濂溪及伊洛聖脉相流沿生平辦香願瞻拜誠倦倦

滕王閣

一舸章江來湍急舟如駛停帆日可中登臨託遐企高閣入層霄下矚疑無地白翻彭蠡波青落匡廬翠野色變朝昏陰晴不一致頓令心胸開於焉足高寄年來汗漫游素抱探奇思岳陽與黃鶴未易分軒輊茲閣鼎足三其他姑且置明歲數歸程載酒從茲醉

祭風臺

中原一戰分斯臺遂千古我來三月初春帆疾於弩陰雲捲夕陽急雨迷烟浦俯仰百感生憑弔臨江澣殘碑不可尋蔓草今誰主英雄志未銷臺下濤聲怒

春陵行

在昔分苗民九溪屬荒徼道州古春陵我來行溪隩湍危怪
石多山僻羣峰峭懸棧三尺強欹斜半傾倒木末猿狖鳴暮
雨山鬼嘯征人慘心鬼奚暇事登眺茅簷十室空土田薄以
磽郊外滿荆榛沙石和泥淖去年苦旱魃今年聞水潦即或
慶有秋更復防賫盜穀供正賦艱況乃征餘耗村夫昨夜逃
郡牒黎明到采風隔遐陬疾苦憑誰告安得元使君民瘼庶
可療

衡陽行

衡山千百尺綿亘橫天南烟霞朝暮變萬象咸包涵上有科
斗書虬龍護深潭奇峰七十二一一羅雲嵐竭來風鶴傳躡
履阻幽探荒郊竄婦女童穉盛筐籃嚴城空九室炊烟見兩

三烽火日數警屯戍添丁男揭竿何爲者滋蔓遂難堪弗戢
將自焚斯言豈迂談肉食少遠謀使我憂心惓所以古循良
廟食誠無慚

曉行

五更聽荒鷄披衣犯朝露月底揚征帆孤城背舟去遙山影
忽移旭日光初吐隱隱見炊烟茆屋出前路一葉柳陰中隔
岸人呼渡

晚泊

瑟瑟曉風涼冥冥寒雲夕雨餘山始青夜靜江逾白初月落
長堤殘風空策策臨流發浩歌斗酒聊堪適漸覺客衣單不
知霜露積

讀昌黎括州夫子廟碑

通南堂詩集 卷一 三
括州設郡初建學山之巔卓哉李刺史爲政識所先煌煌昌
黎文不朽貞珉鐫慨自兵燹餘澤宮蕩寒烟登降躡荒蘚憑
弔空留連興替存乎人寧惟運使然昔賢如可作學者同幪
帡迄今讀遺碑猶共星辰懸

乙酉秋日集朱竹垞夫子醜舫同金心齋戴碧川沈菜
畦分賦三韵得十三末

閒庭秋色深夕陽掛木末密坐少長偕樽前意披豁人生合
并難何事歌摧秣

集吳德聚飛蘿書屋依前韻

疎竹搖輕陰秋聲起天末客至幽賞同把杯月可掇扶醉板
橋歸長空雁路濶

過張氏別業依前韵

境僻無塵喧入門意疎豁小池數尺強水清魚可掇坐久日
向西木葉寒初脫

賈太傅故宅

我謁太傅祠弔古心傷悲立言誠不朽惜哉非其時當日狃
治平一切咸羈縻洛陽來年少忼慨陳便宜首言分封強次
言邊備隳智者睹未然一一如著龜無如衆所忌獲譴在危
詞猶龍有遺訓知雄守其雌書生當始進痛哭誠何爲遷謫
亦主恩敢復懷怨咨長沙卑濕地歲月空棲遲作賦聊自廣
鵬集能無疑惟憂足傷人長壽不可期嗚呼三閭放逐憑誰
訴汨羅夜雨聲淒楚漢文一代稱令主才若賈生棄如土

狸奴行

楚南多狸奴貪性空披猖安眠夜達旦一飽恣徜徉黠鼠日

道南堂詩集 卷一 四
窺伺漸積成鴟張始之穿吾屋既乃毀我裳叫囂呼其徒比
舍咸驚惶昔人重迎貓原以衛稻梁爾何不事事坐令鼠陸
梁鼠虎負厥名肉食恐不祥嗚呼主人心計惟倉箱一聞鼠
竊徒彷徨烹貓掘鼠正典章主人安得長包荒

讀浯溪摩崖碑

崑臺俯瞰江之濱丹梯高插雲峰奇攀藤躡蘚霜露滋探幽
一讀中興碑萬仞摩崖作者誰魯公之書水部辭劫火千載
無傾欹鬼神呵護蟠蛟螭天寶當年國紀墮漁陽鼙鼓動地
悲倉卒儲皇摠六師坤維旋轉危如絲推原禍始不慎持養
癰貽患潰難支漫叟作頌諷且規三謨二雅良可追凜凜平
原落墨時義烈直欲走山魑行人弔古常吁噫縑摹紙搨無
終期浯溪不竭山不移斯碑迺與星辰垂

石鐘山和張超然題壁韻

驚濤千里奔津亭船頭打浪疑風霆濕雲乍洗山意淨石鐘
上下羅烟屏峭壁瓊瓏鬼工鑿清泉一道時泠泠水落不聞
噌吰鏗鞳聲相搏悔不春帆三月揚江舲日暮疎鐘小菴出
霜鴻點點歸蒼冥我思凌風發長嘯江峰影落征衫青

人日

去年鄂渚逢人日辛盤卯酒官廚出今年人日潯江濱零雨
濛濛風瑟瑟春去春來只夢知清江羞見鬢絲絲明年得卸
征衫穩隴上閒吟人日詩

蒙陰道中

層嵐一起忽一伏征人下岡復上岡山下流泉凍作骨堅冰
策馬徒徬徨土俗沙田收穫畢雞犬隱隱巉巖傍相傳此山

道南堂詩集 卷一 五
蒙茸幽邃不可極中有魏晉以上之冠裳男女椎髻自耕鑿
外人欲往無津梁吁嗟乎東西奔走胡僕僕風霜道路常局
縮安得水鄉十畝田長爲農夫沒世願亦足

汨羅弔屈大夫

往來頻溯浙江潮年年八月捲胥濤扁舟遠弔汨羅水更攜
斗酒讀離騷吳楚孤忠同百折江流千古聲悲切苦節應爭
日月光幽寃寧逐波濤滅擊楫中流發浩歌美人彷彿山之
阿那堪夜半三湘雨腸斷淒風落雁多

遊岳麓

衡雲鬱結山之麓沙平水落千櫓伏我來恰值雨初收山容
淡洗如新沐策杖逶迤亂石間青楓樹底藏書屋朱蘂畫棟
凌秋空清谿曲水通飛瀑綠陰人影兩參差只欠蘭亭數竿

竹行行但覺路深幽殘碑零落猶堪讀林梢隱隱出梵宮雲
嵐一帶橫山腹極目江城萬井烟落霞幾點隨孤鷺晨夕秋
山態不同恨不茅齋留信宿神禹奇蹤鳥道開足音三兩聞
空谷山勢連綿一望收下方雞犬皆塵俗徑僻蒙茸不可窮
夕陽催去歸鞭速數家土舍結山坳沙田高下爭收穀昔年
此地未銷兵江濱千里供樵牧民力天南猶未紓征求慎勿
空杼柚

三衢道中

三里五里灘迴船欲前咫尺不可前有時激石勢澎湃有時
捲雪聲潺湲柔櫓輕篙苦無力十舟往往千夫牽下灘開帆
飽風力百里瞬息離弓弦下視游魚清可數長年輟棹船頭
眠人生得失類如此難易何啻天與淵

弋陽舟行有巨石臨江巉巖百尺石壁鐫漁翁隱次四字卽郡誌所載錢倉也感而賦此

弋陽江水方瀾瀾風帆一片去如駛中有巨石百尺高巉巖橫亘江之涘疑是天工斲削成石根衝激無泥滓仰見鐫字甚分明逸事相傳已久矣昔有漁翁隱此間綠蓑朝暮烟霞裏臨流下釣不在魚忘機鷗鳥差堪擬一旦山開自出錢居然致富天所俾嗚呼漁翁得錢亦何爲勞勞徒聽錢驅使君不見失馬非憂得非喜塞翁高識良有以卽今何地無錢倉願君不以彼易此

昌山洪

袁江西下多危湍巖深六月時淒寒昌山洪中恠石攢激流瀆沫疑龍蟠奇峰插入青雲端百丈牽舟力云殫往往觸石

多摧殘吁嗟乎天險相傳灑灑灘此洪日夕奔狂瀾行人欲渡常辛酸直作瞿塘三峽看

武昌舟次輓觀察葉公

公諱映榴
謚忠節

武昌六月裁兵譟楚王臺邊樹阜纛當其先事失籌畫坐令兵子恣狂越城門乍啟復乍關雉堞旌旗如霜耀紛紛從逆盡冠裳忍垢蒙羞改節操亦知小醜無能爲一時白刃誰敢蹈愴赴義有男兒葉公節烈天下奇叩頭刺血拜遺疏三軍可奪心不移昨夜慈闈聞道出朝來就死甘如飴迺知從容有深意臣忠子孝非兩岐客子高眠天未曉五更飛礮驚相擾跣足凌晨出城走譬彼栖栖失林鳥江上相逢歸櫓舟慘絕西風飄丹旄忽忽一拜欠生芻悲歌聲逐烟波渺先生浩氣千古存青山不枯天不老

送茂斯兄自都門歸里卽之幕信州

我家卜築梅溪住後先往往門才聚年來強半着征衫馬蹄
紛踏天涯路伯兄卓犖更不羣文鋒直掃千人軍有時擘牋
落醉墨弱毫揮灑如烟雲昨歲寒衝上谷霜奔沙點點撲吟
囊堅冰曾渡滹沱水鳥道千盤上太行燕山行役今年又我
亦北征恰邂逅爲計別來經兩春相看惟我風塵瘦殷勤問
訊近如何哀哉喪父歌蓼莪弱妹夭亡增我痛洒向西風涕
淚多彼蒼賦命何太酷窮居五鬼還相促數間茅屋破不修
隔年布被冬未贖囊空甑倒弗自支浪跡飄蓬信所之亦知
逐貧無奇策出門庶不聞交謫肩書潦倒入春明寒雲瑟瑟
馬頭生旅舍得隨康樂後不分他鄉有弟兄五夜挑燈同絮
語三冬彈指傷遲暮忽驚門外動驪歌相思從此愁雲樹驛

路橫天落雁哀揚舲直上豫章臺蕪溪泛月題新句蓮幕開
尊倒臘醅只今折柳斜陽裏欲別不別情何已平安兩字慰
倚閭緘愁和淚裁雙鯉更願停驂有一言浮生底事逐萍根
有孫可娛子可教何不躬耕住故園

少女行

瀘溪少女年十三抱書日暮來村南低頭向客深深拜雙鬢
覆額空鬢髮提壺咲入酒家去數錢未慣春酣酣

南昌旅舍逢餘山弟醉賦長句

我從春陵下湘水惡灘日夜奔如駛驚濤千里卸征帆旅館
湏臾駐行李昨朝季子家江來入門乍見雜驚喜狂呼執手
問鄉閭絮語喁喁情未已各訴萍踪東復西茫茫心事我同
爾江魚洵美酒可沽與爾高歌盞更洗君不見春江三月落

道南堂詩集 卷一
花初江上花多枝上疎又不見蘆荻蕭蕭兩岸秋
揔得開花已白頭人生建立湏及時一朝華髮空嗟咨
四十無聞吾已矣對酒不醉將毋癡

梅莊歌

梅莊主人酌我酒酒酣聽我梅莊歌主人一官鬱鬱不得志
梅花樹下時婆娑胸中落拓掃塵埃發爲瑰奇桀驁之詩才
伯仲昌黎役郊島宋元以降何有哉當時犇走長安道胡琴
擊碎成名早時無狗監薦者誰一羶相向青山老寂寂雲亭
少過從主人朝夕梅莊中友松筠兮傲霜雪歲寒節操將毋
同括蒼八載窮搜取踏遍山巔與江滸剪拂滋培年復年春
風秋雨經辛苦君不見陶潛之菊茂叔蓮名花往往因人傳
人生寓意偶然耳平泉草木嗤前賢吁嗟乎歌一闋酒一壺

梅莊歲月無榮枯主人斗酒何時無七十醉翁花作伴不須
更畫妻梅圖

虎斑斑

戊午春有虎入文廟因有此作取詩人刺惡之意也
虎斑斑由來足跡潛深山何爲掉尾走城市橫行直入宮墻
裏重門擊柝嚴晨昏白日未落收羔豚行人挾矢不敢射擇
肥吮血驚相聞吁嗟乎爾牙則利飛無翼陰雨窺人伺月黑
君不見當年周處拔劍怒殺虎無須用弓弩彼巖有穴山有
岬曷不斂跡全爾軀木客山魈不爾庇一朝觸網何其愚虎
兮虎兮我語女咄咄宮墻不可以久處

高忠烈公誄辭

盛朝聲教訖要荒么膺弄兵空猖狂我公當年秉節鉞義旌

凜烈同秋霜曾經百戰除荆棘揮戈指日清
蝨蠶逆臣交構倉卒間天地爲昏日無色
百折忠貞志不回忍死須臾圖報國彼蒼
不弔計不行捐軀赴難孤臣職吾聞義烈
推睢陽至今雙節流芬芳張先就死許就
執不因遲速分低昂天子聞之褒乃節龍
章鳳誥相輝煌僉議建祠詔曰可千秋俎
豆生幽光翠華昨歲臨江汜公家觀察首
再稽涕泣陳情乞易名臣忠子孝天顏喜
論公治績清且明龔黃到處垂賢聲生平
行誼從所重謚曰忠烈協公評吾公建立
誠奇偉丹心碧血昭青史海枯石爛名弗
磨睢陽之後一人矣

射圃歌爲劉郡侯作

括蒼萬仞摩雲間危崗崩削難躋攀由來
郡治枕山麓蓮花面面峰迴環刺史風清
政自簡一琴一鶴情蕭閒堂西數畝

闢射圃小亭結構除榛菅秋高驟馬花五
色風勁懸弓月一彎須知燕射有深意農
隙講武弭姦頑射畢升堂酌大斗羣耦庶
士同歡顏酒酣瀟灑落醉墨夕陽西下啣
青山

家耀如守府招賞芍藥次鄭浣吾明府韻

昔年買醉長安道芍藥丹臺開最早一
羶潦倒對山城元亭寂寂荒青草幾番花
信雨中過朝來乍喜逢晴杲高軒恰報數
枝開招攜頓釋憂心擣皓質疑從雪辦裁
冰肌肯逐紅顏老依稀素袖舞霓裳玉妃
當日丰姿好一時欣賞有羣賢吟邊酒底
同傾倒君不見花開花謝春去來石崇金
谷埋荒苔長安花市人如鶩轉眼繁華何
有哉名花傾國皆塵土逢場但莫虛尊壘

道南堂詩集卷二

越王崢二首

千盤攀鳥道扶屐上危巔地向江流斷山從天際連竹深斜
透日澗曲暗飛泉霸業今難問殘碑自歲年
飛翠千峰暗春郊綠未齊輕風時墮葉絲柳半垂隄水落湖
天小山高暮日低歸途尋石磴曲折過前溪

錢塘乘潮曉發

曉發乘潮漲推篷是處迷奔濤驚地轉駭浪激天低杳冥愁
孤鳥蒼茫暗古隄自憐同賈客片櫂各東西

衢州

一轉一灘險輕帆指顧間枕邊飛白浪眼底失青山往歲烽

初息今來鬢已斑勞勞江上客輸與野鷗閒

常山曉行

殘月荒城落征人趁曉雞峰迴千嶂合徑仄亂雲低帶雪梅
全凍經霜麥未齊涓涓溪下水流過板橋西

吳城

水落寒洲出蕭蕭亂壑平湖雲低欲墜野雀凍無聲颿脚東
西側山腰曲折橫半竿斜日下燈火是吳城

南康阻風

石尤吹不住信宿傷沙隈雪浪兼天湧驚濤撼郭迴還家憑
短夢得伴且深杯數遍南歸雁孤舟倍可哀

萍鄉

萍鄉三楚地牙錯入西江風土衣冠古要荒咲語咙峰危雲

作磴灘淺石爲砭濟勝吾無具登臨興未降

停車

收穫沙田早山農向晚鋤家家新釀熟樹樹綠陰疎急雨暗
深谷西風欺短裾炊烟茅舍起倦客且停車

淶口晚泊

小泊臨江浦千山夕照黃江村收稻早野岸落花香把酒邀
明月停杯話故鄉孤衾眠未穩且趁晚風涼

冷水灘

疊翠臨江浦濃陰萬木齊寒泉懸石罅斷碣卧橋西水市奇
峰簇烟村落照低畫圖誰得似拂硯試新題

麻灘驛

鳥道千盤去丹梯一線通荒郊來野衲絕壁有樵童笳吹山

山月巖花面面風灘聲飛白浪幾點見烟篷

由零陵雙排度嶺至道州木壘山行棧道五十里
斷續荒崖路橫斜亂木撐天邊昏日色足下走灘聲徑仄松
欹立峰懸石倒生雁飛真不到淒絕客心驚

山行

石磴凌雲上芒屨次第行峰巒無數出位置自天成側帽侵
花影危橋咽水聲山腰茅店近土竈好炊秔

七泉

在道州城北
元次山有銘

一水平如鏡何從覓七泉荒村斜照外破寺斷橋邊夜靜拋
魚網秋香滿芋田碑銘思漫叟遺愛自年年

春陵

自入春陵道辛酸奈若何路從山際曲瘴近粵中多擊鼓魑

王會垂環徃女歌槃瓠遺族姓舊史豈傳訛

分宜道中

秋老分宜路西風向晚淒魚龍吹浪出猿狖向人啼雨急千
峰暗雲屯萬樹低孤帆何處泊隱隱聽荒雞

亂石灘

亂石灘頭路江聲日夜寒山根波面見帆影浪中盤雁帶暮
雲沒楓啣落照殘孤舟淒絕處客淚不勝彈

涿州道中

信宿黃埃裏山容目未經今朝天色朗樹杪出尖青斷塢銜
斜照閒鷗沒淺汀行行前路好數遍短長亭

憶故園

家山雲樹外夜夜夢魂飛草舍斜橋渡花田曲水圍風塵三

道南堂詩集 卷二
載隔鴻雁一春稀料得倚閭望征人歸不歸

趙武靈叢臺故址

唐宋聞家禪居然主父開雄心傳霸業失足在叢臺廢苑迷
青草空堦長綠苔只今憑弔處明月不勝哀

廉將軍墓

千古傷心事長平幾萬人餘年思用趙彊敵未忘秦墓草經
春徧碑文歷歲湮還將當日恨灑淚弔荒榛

姜里城

演易聞姜里斯文賴未湮艱貞臣節苦斧鉞主恩新曠代瞻
遺像荒郊泣野燐拘幽曾作操引罪見忠純

淇水

不聽灘聲急於今已七年偶來淇水上宛在越江邊鞭影留

芳草村鋤帶曉烟千竿曾此地憑眺一凄然

遂平道中

斷續前村路行行問野夫亂流時渡馬禿樹不棲烏村店荒
難覓山容遠欲無非關春有恨淒絕客心孤

恨這關

亂雲荒鳥道結伴過山巔徑窄疑無路峰迴忽有天悲風聞
虎嘯曠野見狐眠茅店前村近因思駐短鞭

安陸道中

石骨行經盡林梢出遠村暮雲山影合空谷鳥聲喧籬結千
竿竹溪圍十畝園此中容卜築不數武陵源

漢口夜泊

十里舟成市東西盡水程青燈搖樹影白浪湧江聲風引千

道南堂詩集 卷二
檣轉雲消片月明客愁眠未穩側枕聽雞鳴

十三日夜集仙棗亭觀燈限韻

不有今宵會誰知此大觀天空搖皓月雲淨出層巒密坐忘
更永深杯敵夜寒銀燈千萬點移過石闌干
人家烟樹底明滅見漁燈襟帶雙流合江天一色澄望中山
作障興至酒如澗千古樓頭月招攜約再登

嶽麓寺

天半濃陰合疎鐘出梵宮竹筒通澗水石徑響松風野曠餘
殘燒峰危落斷鴻春江新霽後點點見烟篷

和金陵女子題壁詩次韻

相思桃葉渡曉夢到江鄉纔見挑鬟出旋聞點翰香楊枝飄
落絮梅雨逗新涼愁絕雲鞦裏春風旅恨長

臨洛道中

亂紅新霽後點點落吟鬚濃淡看山色參差入畫圖春殘鶯
語老夢斷客心孤舊侶應相憶飄零一酒徒

送約山弟之金陵

驛路寒花發蕭然賦遠遊分飛鴻雁翼千里稻梁謀烟霧迷
征騎雲山繞戍樓池塘應有夢得句不勝愁

雨坐懷沈孫謀

濕雲低遠渚獨樹野人居烟暝遙峰斷天寒落雁初只愁生
計拙莫怪世情疎爲念同心侶幽窻好著書

秋日漫興

寂寞秋村裏西風鴻雁初尋詩來勝侶種竹借隣居碧水沉
烟淨明霞爛錦舒悠然北窻下兀坐理殘書

道南堂詩集 卷二 五
欲向南村去陰雲鎖不開黍禾猶未刈風雨莫教催渚冷砧
聲急秋深雁叫哀登高還有約扶屐且追陪
偶泛寒江上輕帆帶夕暉幾家臨斷岸仄徑傍危磯秋到梧
桐早霜催橘柚肥恰逢漁父櫂斜向板橋歸
柴門無剝啄松竹意偏親洗硯題新句攤書見古人白雲懷
遠岫黃菊傲霜晨逸興憑誰遣溪頭理釣綸

送茂斯大兄之山右

不遇心多感無家賦遠遊曉風催朔雁落日照吳鉤水繞春
郊樹雲依古戍樓晉陽邊塞近羌笛使人愁

送分虎

送君南浦外不忍聽驪歌客路雲山繞蠻天瘴癘多角聲悲
絕域雁影落長河倘遇梅花發鄉心更若何

次韻答張齊仲

憶昔分攜處淒其旅舍中一鞭燕市月五兩洞庭風選勝情
猶劇謀生遇轉窮感君鄭重意未敢薄吾躬

早秋途次阻雨

短策紅塵裏秋光一抹微驚風落病果急雨點吟衣躑躅歸
途滯淒其客思非今宵有鄉夢新漲到漁磯

宿山口

慚無濟勝具辛苦陟山鄉筏薄緣灘淺峰危覺路長晚烟和
雨重春徑落花香村酒寧辭醉高眠有竹牀

偶感

往事真無策今吾豈熟籌幾回堪鑄錯百練已成柔弟妹憐
輕別妻孥怨遠遊負他城下水日日送歸舟

輓張振芳

懷才偏早逝客路更堪哀撫襯無妻子招魂空酒杯鶻啼應
有血蝶夢已難回腸斷憐癡叔遺銘慰夜臺

斗室

斗室囂塵隔蕭然野衲情暮鴉歸有信殘葉墜無聲遠岫看
雲出頽垣見月生已拋名利念贏得夢覓清

悔

事過方知悔長貧誤子孫文章誠小技意氣亦徒存難博千
鍾養誰酬一飯恩曳裾宜若可何處是侯門

蘭江道中

寂寞蘭溪道西風傷客心山容雲外淡樹色雨中深斷雁憐
孤去空江愁獨吟遙看燈火處野渡尚難尋

餘嶺

初乘殘暑出今逐早寒回餘嶺西風外荒村野店開山雲隨
雨沒征雁帶愁來辛苦高岡路空將白髮催

賦得秋來風扇屏和沈子振韻

何處輕風度蕭蕭萬樹秋披襟真足快殘暑已全收寒動砧
聲急涼添竹舍幽有時成棄置團扇不禁愁

遊三巖病歸伏枕匝月

本爲尋幽去翻因卧病歸秋風侵短榻驟雨怯單衣階下苔
生滿門前客到稀吾衰今甚矣壯志已全非

道南堂詩集卷二終

道南堂詩集卷三

銅鼓

罇于攜得自蠻中逸響千秋感慨同
蠡辨看來仍細細鼉鳴聽去更逢逢
不隨銅雀埋青草還對金人泣曉風
曾記繡殘南郡志遺銘欲續思無窮

浯溪鏡石

誰將片石嵌雲岑照徹瀟湘自古今
朗鑑偏能涵近遠清光原不間晴陰
叅差帆影當空落歷亂花枝隔岸臨
愧我年來雙鬢改幾回拂鏡獨沉吟

南陽河

楊柳堤邊春浪濶鯉魚風急水重紋
家鄉鴻雁千江隔星野

道南堂詩集 卷三
青徐一棹分淡抹山腰啣落日亂拋漁網拂歸雲溪頭浣女
新妝束只欠湘羅六幅裙

分水廟

沙邊古廟一徘徊落照千山向晚開泗水中分當檻入岱雲
天半落牆來閒庭雨過生青草斷碣年深長綠苔近日故園
消息杳欲憑歸雁問官梅

舟次蕭家林見西山一抹落照千村宛如圖畫計從齊
魯入燕風塵蔽目不覩此景已匝月矣慨然有作

宿雨初收見遠嵐宛然好景是江南林梢帆影移斜照樹底
鐘聲出小庵一帶麥苗青似染半篙溪水碧於藍來朝擬別
吟橈去更買風鞭思不堪

九日

記得江村九日過登臨曾不廢吟哦而今縱有劉郎句那復
重尋尹氏歌清酒三升徑醉矣黃花滿把奈秋何他鄉不盡
傷心處風雨朝來落雁多

真定道中

路入恒陽萬井烟垂楊是處落晴綿西來地勢全臨趙北去
山光遠控燕細菜抽花黃似錦新荷透葉小如錢眼前忽憶
江鄉景踪跡飄零已四年

岳忠武故里

孤墳曾謁吳山畔故里初經倍黯然敗草經秋凝碧血愁雲
薄暮蕩荒阡誰教奇獄成三字遂使忠魂泣九泉讀史難銷
千古恨湯陰松柏自年年

端木子祠

道南堂詩集 卷三
破曉祠邊駐蹇驢遺碑讀罷一躊躇分明異日儀秦事傅會
當年吳越書山色蒼茫窻檻入燕泥零落屋梁虛只今祀典
隆昭代會見儒臣載筆初

許州

小橋西去水潺潺城角遙看數點山馬踏落花紅破碎鶯啼
暗柳綠中間千秋霸業空憑眺一片浮雲任往還愁聽譙樓
荒漏起淒涼殘月掛銀彎

遙拜楊忠烈公祠同龔邁種作

成仁豈是先生願一死無慚正氣歌莫恨空言誅宦豎至今
遺疏重山河淒風五夜聞鶉泣蔓草三秋見雀羅瞻拜早留
他日約準扶山屐一經過

集墩子湖步韻

細雨廉纖散曉烟招攜信馬綠堤前紆迴別徑聞香芷彷彿
幽棲到石泉某水某山亭外景一觴一詠酒中仙扁舟指點
斜橋畔欸乃聲聲唱采蓮

大別山

大別千年存禹績巉巖亂石抵奔流沙邊雲樹分湘漢木末
人家放馬牛一帶青山真入畫再過黃鶴倦登樓夕陽底事
催歸急輸與烟波江上鷗

鄴都曉發

五更雞唱促行裝翦翦春風到客裳山脚斜銜殘月冷林梢
微透曉天蒼征人指點興亡處往事淒涼戰伐場剩有盧家
雙燕子呢喃猶覓舊雕梁

白燕

道南堂詩集 卷三
三
海燕年年結侶回，差池素羽共徘徊。須憐月夜依稀見，寄語
晶簾次第開。掠水似從銀漢下，啣花疑向雪宮來。玳梁新壘
棲方定，秋社西風莫漫催。

贈胡天岫

江村片月照牆匡，秋色蕭條落木黃。未買青山從市隱，還將
白雪寄詩狂。風來曲檻移花影，聲度長空有雁行。客至不須
求姓氏，竄身無地學韓康。

立春

一分春信到天涯，習習東風透碧紗。醉裏暫時忘作客，愁來
無夢不還家。好憑勝侶探梅萼，便屬行廚煮菜芽。華髮年年
添幾許，可容憔悴負鶯花。

嘉魚道中同錢飲光先生賦

春江二月載烟篷，暮色村村落照紅。千里濤聲來枕上，四圍
山影入樽中。依稀此地留殘壘，點綴於今有釣筒。如許詩人
經赤壁，可無佳句弔東風。

戊辰元旦泊舟湖口南岸

不堪異地逢元日，更是孤篷泊水隈。彭蠡湖流隨臘去，大姑
山色逐春來。相看隔岸留殘燒，何處遙村探早梅。料得故園
椒酒會，共思遊子一停杯。

上鐘山

徑仄凌空鳥道攀，洞雲深處欲忘還。驚看湖水奔江水，翻認
真山作假山。檣影高低移樹杪，鐘聲遠近落松間。殘碑搜出
元和字，不負登臨半日閑。

下鐘山

道南堂詩集 卷三
層巒曲折抱孤城選勝招攜次第行杳渺雲林穿石罅
嘯
日夜走江聲南來飛翠千山落西去炊烟萬井生殘日春風
憑弔處蒼苔掃遍不勝情

泰安道中

寂寞霜天匹馬還絲絲鞭影夕陽間幾家烟火客投宿一院
松風僧閉關黃葉飄時添旅思白雲飛處隔鄉山秦封日觀
等閒過未得扶筇絕頂攀

嚴州

隱約孤城出翠微隔江燈火見柴扉清泉百尺穿雲下白鳥
一雙掠水飛棹轉鐘聲來破寺月明山影到征衣今宵旅夢
知何處露濕芙蓉落釣磯

湘潭道中

三湘南去片帆輕路指衡陽更幾程蘭若深藏千樹暗芙蓉
斜映半江明千秋殘碣留銅柱一夜西風戰石鯨熟路山靈
應笑我飄蓬猶是舊書生

祁陽道中

翠嶂行看萬疊遮瀟湘西去片帆賒危磯江底沉千尺茅店
山腰有數家渺渺烟光生細雨飛飛燕子掠平沙停舟爲想
秋深候楓老寒灘樹樹花

濟寧旅次同嚴人弘晚步

旅次征人乍卸鞍閒招新雨步前灘偶逢破寺尋碑記每到
平磯羨釣竿一幅蠻牋詩思苦片時吳語客愁寬相看豈必
風塵老祇是年華已過潘

贈錢飲光先生

道南堂詩集 卷三 五
歷盡烟波幾十春寒江空老一遺民間消歲月憑詩史剩有
鬚蒼看世人千古文章身後定孤燈風雨客中親傷心莫問
當年事滄海桑田迹已陳

和毛德遴自楚入粵留別原韻

陸賈當年使南粵方山佳話紀黃州梅花村裏聽鸚鵡廣燕
亭邊叫栗留遠道三更寒月落懷人萬里暮雲稠敲詩料得
奚囊滿歷歷奇峰到馬頭

喜晤茂斯兄

破浪南來驛路長計違康樂兩經霜最憐異地同飄泊更訝
相逢各老蒼挑盡寒燈談往事聽殘夜雨暫聯牀敝廬何日
偕歸隱數稜湖田幾樹桑

遊月巖

料峭輕寒掠面過招攜侵曉出城阿秋原着雨稻孫長野渡
拋罾魚婢多徑僻漫憑田父引曲高應付雪兒歌時有麗人同遊月
巖叢桂花初放一路香風撲楨羅

徐澄源招同韓景阡遊芝山

招尋吟伴到前溪指點芝山野渡西小艇翦江秋水濶寒郊
策馬夕陽低分曹量醖同新雨曲磴探幽憶舊題颯颯西風
堆落葉亂峰歸路一時迷

聞子規

南來客思絕堪悲又值西風泣子規每到荒江舟泊處恰當
夜雨夢回時哀同斷雁腸應碎聽比愁猿鬚欲絲偏向征人
啼不住一聲聲在最高枝

輓張邇可廣文

道南堂詩集 卷三 六
何事高山半嶺摧遺編一讀一悲哀時宜不合非關傲造物
無情亦忌才絳帳蒼涼留宿草雲亭寂寞剩荒苔青箱自是
千秋業有子傳家慰夜臺

三巖瀑布

千尺荒巖瀑布開疑烟疑雨亦疑雷長空直界青山破一片
遙飛白練來日午噴寒時黯淡坐深忘暑共徘徊涓涓洗盡
蒼苔色未許塵寰到點埃

重九次日集張淮南署中

官齋咫尺白雲隈典却朝衫換酒來藍尾連千催月落黃花
次第犯霜開分曹算子敲碁局密坐裁詩掃石苔好是秋容
猶未老還期牽醉共登臺

茭青嶺

扳援直與碧雲齊俯瞰平林萬樹低一片夕陽山向背千盤
曲磴路東西長空寂寞翻鴻陣小市蕭條印虎蹄亦有春風
到幽谷亂紅飛處草萋萋

黃碧村

春日山無一定姿乍濃乍淡晚晴時小桃帶雨慵如醉老樹
盤根禿逾奇花院香邊忙鳳子柳塘深處種魚兒肩輿送我
丹青裏數遍前峰得句遲

寓劔川禪院

禪院春深小坐宜茆檐鎮日嘒黃鸝新篁長處有清韻嫩葉
生時無醜枝風送茶香閒裏得倦來睡味客中知還嫌薄暮
鐘聲起窗外松陰月到遲

括州

瘠壤勞民絕可嘆沙塍播獲倍艱難三春得雨時愁潦六月
無雲又苦乾發粟於今歌帝德省耕自昔重田官農桑本
是籌時策好把豳風取次看

荒城四望總淒然括嶺東來別一天百疊參差山作障千村
高下石爲田月明孤枕爰如訴日落重門虎自眠借問桃花
無恙在可能洞口駐神仙

陳子弘索賦生挽詩

短鍤長隨入醉鄉無心落拓古之狂才名自是生無敵筆墨
須知死亦香預築一杯邀弔客時留片月伴吟牀蒼天有恨
高難問壠上悲風欲斷腸

寂寞衡門冬復春一生辛苦作詩人窮來韓愈文難送醉去
張顛筆有神如許風流傾海內漫無汲引到江津慙慙絮酒

生前薦應勝荒郊泣野燐

黔婁倚頓亦何殊人世由來等白駒自祭應推元亮達大招
還咲景差愚憑教春塚埋詩骨不信黃泉乏酒徒知有名心
銷未得挽歌千首當生芻

暮過石門洞

萬點花飄野岸香江流曲折引風檣兩峰欲合水全綠殘燒
初迴草半黃飛瀑遠從霄漢落斷碑閒挂薜蘿長石門指點
烟雲裏咫尺登臨病未遑

慶元道中

宿霧空濛四野垂殘紅零落已多時小橋流水因風急別浦
歸雲帶雨遲隴上晚鋤青箬笠竹間新補綠槍籬懸知農事
村村畢釀得香籩賽古祠

秋感次及門汪無已韻

飛揚跋扈少年場老去從前莫較量冷月一鉤寒絳帳新炊
幾度斷黃梁尋山常負秋如錦對鏡堪憐鬢已霜倘得荷鋤
歸計穩綠陰深處結茅堂

涼秋葉葉下庭梧自笑窮吟一老儒那得春風回黍谷但能
大隱即蓬壺興來長嘯消清晝客去高眠任懶夫見說長安
棋局似食貧豈必負妻孥

梨花和韻

珠簾乍捲玉臺西可愛花陰拂案齊淺淡數枝邀月共欹斜
一樹壓霜低暗香飄處疑梅塢素影橫時傲柳堤聞說扶桑
仙種好冰姿端不讓張梨

陳千頃招同錢以白遊三巖

芒鞋結伴犯霜天五里山程破寺邊慘淡愁雲聞落雁空濛
疎雨灑飛泉飄殘寒葉疑無路蝕盡荒碑不記年遙指前村
風色好小橋流水夕陽偏

咏印分得孫字

烏篆龍文自可論銀章強半出侯門能教得意誇賓從惜不
相隨長子孫攜帶由來同紫綬巡行只合伴朱旛獨慚吏隱
渾無事一任塵封到曉昏

咏籬菊

連朝黃菊數枝開曾向東籬手自栽慘淡正逢青女候淒涼
無復白衣來叢條疊翠侵書卷細蕊含金映酒杯不比春花
零落後空傷紅雨點蒼苔

蘆灣道中

道南堂詩集 卷三
白茆黃犢野人家禾黍初登近歲華冬日乍溫知欲雨南霜
雖隕不凋花清流百折灘聲碎翠色千竿竹徑斜好景最能
留客駐渾忘搖落在天涯

石塘嶺

層巒面面削芙蓉破帽衝風策短筇百折峻嶒穿鳥道四圍
縹緲插雲峰那堪冰雪欺征客悔不桑麻學老農五夜夢回
歸未得淒涼野店響寒蛩

道南堂詩集卷三終

道南堂詩集卷四

銅雀臺

霸圖空赤壁歌舞歇黃初臺畔青青草年年見野鋤

湖口立春

東風昨夜吹知是春生處不從春水歸偏載春愁去

三仁故里三首

備恪他年事當時只遜荒還將離黍恨含淚問蒼蒼
不得箕疇衍誰將道統傳至今滄海外禮教說朝鮮
敢諫知無補全軀那足論千秋難藉口賴有太師存

彰德道中

寒雲時出沒漳水自東西一徑僧歸去千山鳥亂啼

嘉興梅會 李琇 琢亭

送仲弟約山之廣昌

因人何近遠聚首總萍根最是傷心處相看無一言

秋江曲三首

郎登江上舟妾汲江頭水
鴛影倩郎看何如明鏡裏
十五盈盈女秋來學搗衣
戲將纖手拍驚起鴛鴦飛
山南秋兔肥山北雙雉飛
少婦江頭望兒夫射獵歸

慶都道中

廉纖細雨洗塵埃曲曲春流長
綠苔隔岸鐘聲人不見落花
無語燕飛來

良鄉道中

村坳土舍兩三家驢背馳來撲面沙
憶得江南春正好汲泉
煮筍試新茶

明月店

濕雲初斂日初斜燕子翩翩掠岸沙
遙望一枝春色好梨花
小院是誰家

李左車故里

百年功業已銷沉落日悲風思不禁
何事雄心銷未盡還將
兵事說淮陰

宋廣平墓

感慨松楸向晚風當年高節薄姚崇
莫言相業承平易天寶
流離轉盼中

荆卿故里

易水蕭蕭氣未平史遷着意寫荆卿
一番痛飲千行淚猶見
悲風紙上生

比干墓二首

已去人心不可知，孤忠一死復何辭。
剖心得在君王側，幸是周師未入時。

禾黍猶傳故國思，周京蔓草已多時。
衛濱留得一抔土，千載仍歸殷太師。

鄭州道中

柳堤沙岸繞荒津，說是當年洧水濱。
借使春流無恙在，月明可有采蘭人。

遂平縣口占

土舍茆檐只數家，夕陽烟樹亂棲鴉。
山夫三兩踉蹌至，知是傳呼坐晚衙。

信陽山行

輕風細雨送殘暉，欸欸沙田白鷺飛。
樹外青山雲外樹，幾重烟景落征衣。

一帶雲旌傍水來，日高風動角弓開。
只看山脚飛塵起，雙兔捎從馬後回。

月湖三首次何蔚宗韻

山容劣削水淙淙，兩陟層巒兩渡江。
載酒尋春春總好，月湖靜處泛銀缸。

女牆斷續露山尖，野店臨風漾酒帘。
彷彿六橋三五夜，綠堤垂柳挂瑤蟾。

趁風緩緩颺輕帆，集似蘭亭少長咸。
譙鼓鼕鼕人醉後，寒江烟景落歸衫。

趙北口

道南堂詩集 卷四 三
萬樹垂楊盡覆烟綠波灩灩草芊芊羨他生計漁翁好沽酒
烹鮮落照邊

琉璃河

河畔青青近麥秋千山飛翠落征裘春原一片渾如畫羃幕
平沙放馬牛

雙河

沙塍高下路西東幾點蘆花幾樹楓莫道寒山太岑寂夕陽
人影畫圖中

旅店客談滇南風土之勝

醉眠大理屏爲帳客至雞髮菜作羹最是山茶開更好雪中
爛熳送歸程

樟樹鎮雨泊

昏鴉結陣亂雲蒸風雨依稀認墦稜最是愁人眠未得孤村
戍鼓夜船燈

臨江道中

澄江一片抱孤城雨送新涼向曉行棹入萍花最深處水禽
無數不知名

夜泊

蘆荻西風白露秋蕭蕭暮雨不禁愁黃昏破寺鐘聲出野店
孤燈待客舟

題陸日爲廬山圖

紫霄東望白雲閒飛瀑千尋不可攀搜出廬山真面目從教
畫本一齊刪

送徐電發太史給假還吳江

蒲帆十幅坐吟翁
瀟洒依然處士風
正是江南秋色好
家山一路畫圖中

同沈覃九夜話賦贈

歐九文章柳七詞
風流千載爾兼之
最憐孤館聯吟處
半是殘更細雨時

旅次題壁

一入門來塵几拂
安排筆硯寫新詩
他年歸釣烟江上
還憶孤吟旅店時

長沙偶過胡聽巖廣文講堂

信步蓬門叩橘童
清聲彷彿出絲桐
一瓊我亦甘憔悴
蕭灑相逢夕照中

落花

殷勤寄語可憐花
任逐東風整復斜
飄泊不須愁近遠
纔離樹底即天涯

春陵風俗合盃前
一日閨女唱歌徹
夜清越可聽次日
壻謁女父母唱歌之
女執杖打壻設箕帚
等物徧令跪拜有至
委頓者雖士夫家皆
然禁之不止也偶述
所見以志土風

鵲駕仙妝幾度催
唱歌聲徹彩雲回
竹兜載得如花女
小杖爭攜打壻來

箕帚多般列錦堂
咲聲一片口脂香
行人馬上齊回首
不看新郎看打郎

和龔叔損順德道中無題六絕句

落花細雨促征鞍
淺醉應堪敵曉寒
因見前村山色好
不遮

湘帕儘人看

捍撥檀槽馬背馳無端心事蹙修蛾年來聽慣涼州曲可記
吳儂子夜歌

衝雨拖泥素未諳絲絲愁緒似春蠶妾心願比雙飛燕便逐
東風死亦甘

禁旅南回意象豪紅鴛對對秣官槽朝來小隊春塵裏羅襪
輕盈雜佩刀

欲將幽恨削溪藤羸馬黃埃倦未能到眼青山題不得百般
心事上睂稜

禿衿小袖勝蘭裙不事挑鬟掠鬢雲耳後銀璫垂十二須知
生小是從軍

疇某上人二首

適逢杯渡早秋天一炷爐香息萬緣靜坐空庭明月好不譚
塵事不譚禪

秋聲蕭瑟落疎桐歷歷浮生嘆轉蓬那得便攜雙不借相隨
瓢笠萬山中

寄內

十年飄泊嘆萍根冷煖何曾得共論記取這番歸計穩白頭
相守看兒孫

春來

春來何事最關情雲物閒占定雨晴稚子牽茅晨補屋山妻
掃葉晚吹羹

春雨

茆堂寂寞坐吟翁烟樹愁雲處處同昨夜春風吹細雨小桃

添得一枝紅

川茶

不隨桃李鬪芳華獨殿春風爛似霞
怪得一庭新綠候更傳
花信到川茶

太平客店

西風到處客先知正是霜天慘淡時
睡起寒窻無一事研朱
批點海棠詩

羞婦亭

不信空山老負薪誰來物色向風塵
湏知未遇時辛苦只有
相隨一婦人

麥飯亭

一戰昆陽百萬師真人自此不須疑
誰知王業成河北偏在

淒涼麥飯時

晚步

晴川遠眺破愁襟一帶春苗似綠針
小院三間斜照裏丁香
花底出鶯吟

應山道中

天半孤雲盡日閒水渚一片傍溪灣
絲鞭忽向林梢轉失却
青青萬疊山

明港驛

小白蕙紅事已闌伶仃瘦馬度前灘
客中無奈春歸早寒落
花枝未忍看

舟行口占

山根剝落凌空出樹色參差掠眼過
底事東帆復西棹烟波

道南堂詩集 卷四
渺渺奈愁何

贈伊魯庵先生

未肯閒居負好春時移小艇問花津偶然姓字人能識三百
年來一逸民

留題天童密祖小影時寓劍川禪院

彷彿親承不語禪有時趺坐有時眠而今趁却晨鐘去雲水
無邊月滿船

晚步

落葉前峰路已迷偶攜竹杖過溪西夕陽樹上無多影野雀
籬邊任意啼

道南堂詩集卷四終

家分虎名符號耕客與兄尋壑秋錦皆吾宗異才四方交游
有三李之目蓋其曾大父予伯祖伯遠公明萬曆間名孝廉
官南國子博士以能詩雄于江左鍾廣漢先生謂是時七子
之習變爲叫呶公安之派漸已淫永伯遠先生激彼頽波力
返正始其推重如此耕客與其兩昆之壩簾風雅淵源固有
自也尋壑秋錦詩集已行於世耕客花南老屋詩集歿後三
十餘年尚藏於其家乃索而刻之舊刻香草居詩一編亦入
焉計五卷尋壑嘗論兩弟之詩以爲秋錦得詩之清花南得
詩之和信哉皆可以風也維鈞書

卷一

古體五十一首

卷二

古體十八首

卷三

今體九十二首

卷四

今體六十七首

卷五

今體一百二十四首

舊刻香草居詩集序

長水李斯年武曾分虎三兄弟俱淵雅負儁才俱好遠游六
七年前斯年游粵東武曾游黔中而分虎尤越在萬里外在
五溪六詔間當是時海宇方晏安分虎孱焉一儒家子挾三
寸不律與健兒馬客相徵逐常涉洱海汎昆明簫鼓樓船臨

風作賦乃分虎纔一削藁熨童嬰婦爭譜其音節以相嬉樂
抑何壯也既念家有老母日南天末不可以久留則由金齒
歷貴筑從其仲兄武曾間關跋涉以歸蓋甫踰時而西南之
變作夫分虎以曾參齧指之痛得遂其沈炯還鄉之思懷橘
堂前稱觴階下詎非幸哉故分虎所為詩沉雄感激多仁人
君子之言歌有思而哭有哀吾知其源于性情者深矣今香
草居諸什是也常怪今人纔曉句讀便侈然自命為詩人或
高岑或王孟或李杜爭相標榜以為品目至問其所以為詩
輒懵乎其無以應也吾故讀分虎詩為悄然三歎也會分虎
屬予點定既竟綴數語歸之康熙戊午春二月崑山徐乾學
謨

花南老屋詩集卷一

辭家作

嘉興梅會 李符 畊客

漫漫夜將旦旭日耀高岑鑽火治朝食盥手抱宵衾別母非
子願辭兄傷我心斑斕換征衣壘篋有繁音窮後趨異谷野
鶴出故林歡酒未盈觴離懷故難任

良朋篤友愛相送河之濬黃鳥啼綿蠻紫燕飛差池牽裳不
忍別攀折楊柳枝芳樽傾魯酒雜佩遺江蘺旣逢絲竹餞復
惠琅玕辭不惜遠行役所慮昭質虧連車漢庭謗抱璧秦王
欺保身效先哲蹈世避虞機嘉意均有託炯言良足持青門
承昔宴河梁繼前徽音容雖暫隔金石恒不移盍簪續良會
三載以為期

高淳縣別蔣烏几

風吹夏雲馳南浦春將歇坐對青山深綠樹亂鳴鳩我登白
門車君上宛陵楫十日同端征何爲復離別聚散若萍花憂
心忽如掇

讀史

沛公西入秦成功藉羣勇裂土分珪爵將相寧有種烏盡良
弓藏一朝失隆寵斬西逞精兵敗北不旋踵韓彭爲俎醢諸
侯皆震恐獨有種瓜人全身在田隴

長卿善讀書結髮事漢皇散職非所好謝病游大梁歸來益
貧困滌器酒壚傍王孫重貨財安能禮賢良召入賦上林朝
奏夕爲郎建節使蜀都觀者儼成行小人慕勢位君子重文
章遺草雖寥寥篇翰有輝光

安漢託符命居攝旋即真金刀不爲利皇綱忽沉淪當時頌
德者皆得據要津劉歆旣受爵子雲亦美新梅福在下位投
簪謝家人變姓隱吳市遺榮若埃塵爲仙即莫考高節已殊
羣

拘學抱尺義與世無重輕旦暮老巖穴湮沒誰見稱何如游
俠輩慷慨忘死生朱家重然諾意氣凌公卿陰脫季布厄飲
德不自矜雖不軌大道布衣垂令名

紵衣贈季札縞帶獻鄭僑結納慎所擇百年如一朝廉藺離
復合由來重素交耳餘不相能後世徒見嘲白璧投河伯信
誓指波濤歡愛鮮克終棄擲如鴻毛惟有崇明德庶幾可久
要

干將苟不利宰割難爲功蟠木爲乘輿所貴有先容食其非

狂生白首氣猶雄一出取陳留再出下山東倘無騎士薦淪
落監門中

出洞庭望君山

岷峨積雪消洞庭水涵虛南包星沙城北亘巴陵墟波濤浴
日月江漢爲溝渠舟師駕楚榜旅客操吳歛乘流木葉下挂
席涼風徐中有十二峰俯瞰千里區帝子猶未降神靈安其
居懷糈誰結言捐佩空踟躕安得麾蛟龍梁津使涉予

雪中登後崖

嘗讀黔中志後崖有奇跡客遊經黎峨深冬訪泉石控勒懷
寒冰衝風禦狐腋漸見瀑布流照耀積雪白况迺梅花開飄
落同一色舍騎憇長松捫蘿登絕壁舉手掬浮雲影落衣生
碧恍若遇洪厓翩然來姑射始知羅施間亦有仙靈宅

自碧雞關至黑龍潭置酒

良辰三月好煙柳萬家迷駕言出城曲驕馬一羣嘶昔有青
鳳鳥飛來山之西滇人不相識呼鳳爲碧雞碧雞去已久關
前鳴黃鸝客行覽舊踪傷心草萋萋晴嵐逼衣袂引我轉迴
谿谿斷路忽窮上有法王宮龍潭環其左錦鱗游當中波清
深見底相照山花紅春芳不再豔瞬息零飄風安能不讌賞
而與俗子同且聽玉笛奏莫使金尊空夕陽促人還醉倒扶
雙童歡樂猶未足放歌昆明東

昆明覽古三首

東登金馬山高岡委榛蕪神靈安可致漢武一何愚空悲王
子淵持節喪道途

昔有苴蘭城莊躡王時築俛仰感衰興停驂縱吾目遺跡渺

何處土人種麥菽

滇池五百里漫漫接長天當日彩雲生照此池上蓮蓮花至今開雲散已千年

贈葛星巖孝廉

孝廉秉內美悅澤如春陽盛年賦子虛英名擅遐方早受王陽薦宜登宓子堂遲遲且未出深沈覽篇章曠懷誠所慕邂逅說借臧我爲東武吟君賦君馬黃雲泥各行志高調同鏗鏘平生一縞帶約束走四方珍惜不輕棄今請獻君傍

擬古四首

美人居高樓不畫雙蛾眉冶容本殊衆豈在膏沐施當春忽有懷手攀芳樹枝盛年慕婚姻情至非邪思欲適無良媒坐嘆青陽馳幾愆天桃節不賦褰裳詩

越客厭扁舟願言駕騏驎西行望秦關長楊夾廣路巍巍甘泉宮鬱鬱新豐樹雞唱青門開車塵若煙霧立談取功名朱紱易韋布人爵苟道得顯榮亦所慕周行直如矢我游獨窘步中道無饗殮且獵南山兔

海燕識舊巢林鹿戀山陽人生在逆旅能不懷故鄉故鄉渺何所茫茫限大江

渠陽切

涯涘廣以深鼃鼃難爲梁升高而遠

望遊子情孔傷三載一征衣思婦昔寄將經時弗浣濯垢敝闇無光爲念閨中意未忍棄道傍

春芳嬌白日阿難臨大道天風從東來吹落同枯槁俛首拾殘英愛之未忍埽我有桃花顏鏡中不長好手挈白玉壺沉醉須及早何爲舍樂方戚戚傷懷抱

席上分擬古樂府得將進酒

五陵貴公子門外青驄嘶脫下蓮花劍聽歌白紵詞滿堂會
嘉客屬意終爲誰盈盈年十五纖手捧金卮蘭膏半明滅玉
繩當戶低放杯理瑤瑟此調君能知

春雪嘆

青陽斂朝日雨雪春載途狂風拔茆屋寒氣凝肌膚誰家擁
樓臺張樂圍紅爐廐中有飽馬桑下多餓夫

送彭孝廉之金陵

華節變朱夏風吹蕙蘭芳長楊夾郊衢游子換征裳匣攜綠
沉管騎控青絲韁藻思旣無比德音亦孔彰問君將何之言
作白門行白門我舊過繁華盛名倡攜尊挾翠袖搖艇出橫
塘此時芙蓉開空中聞妙香十旬不言歸絲竹爲歡場今日
送君往我乃在異鄉聚散未足惜昔遊殊不忘安得雙羽翼

隨君以徜徉

雙松篇爲黍字賦

亭亭雙青松昔從太華移去年見手植僅與屋角齊今秋高
出墻勢欲拂雲霓清陰落庭榭俯映瀟湘姿雜木不愛種特
取情性宜幽人當卧起翰墨灑淋漓箕踞洗片石邀客坐題
詩珍禽忽來巢和鳴東西枝涼風正徐動憂擊簫韶吹昨驚
暴雨至草木皆離披千年合抱柳拔根欹路岐獨有徂徠質
無恙浣花溪珍重保歲寒只合掩茅茨

讀澹餘先生詩集賦三短章奉寄兼謝點定客滇近詩
之教

青土多良材誰爲典型者先生人中豪扶衰振大雅底柱障
百川狂瀾無傾瀉從天墮夜珠光芒燭四野梧臺有片石慚

愧不堪把

壯麗帝京詩瀟灑黔中吟正聲一何多被我龍脣琴泠泠宮
商殊乃是太古音清風灑虛室申詠得所欽雖無陽春和庶
知作者心

聚藻生參差託根澗中石采之不盈檐持獻誠所積豈如蘭
蕙花含馨美人側何意盛筐篚舉手煩選擇一朝發華滋枯
榮異今昔

石柱洞

言尋萬古蹟策杖月狐邊上攀千年松下視百丈淵瀑流噴
珠沫亂灑落我前倚磴怯回顧洞口藤蘿牽執炬入窅邃茫
茫吐雲煙石柱連四五摩挲滴清泉猿鳥不敢窺蛟龍或潛
眠古貌一老僧來此自何年問言恒不答無乃是神仙

送劉秀才歸河內

天末方沍寒我作尋陽客邂逅如平生談讌樂朝夕駕言並
轡游清嘯發越石雪飛鳳梧山素影搖廣陌陽月正溫和梅
花動春色花下彈素琴忽作懷歸吟牽裳不忍別握手登高
岑望望孟津道冰結黃河陰迢遙幾千里南北分辰參良覲
復何時離懷實難任

楊升菴太史祠

憶昔康陵初新都擢高第校書登木天淋漓玉堂製忽攀鼎
湖髯再事繼統帝議禮隨相君堅引定陶例痛哭奉天門詔
下金吾繫謫戍漆齒鄉束馬衝炎癘窮愁但著書博物乃夙
慧瘞筆成高塚鏤版貴荒裔倡和得張含壚頭酒頻貫繁華
錦官城草玄閣久閉香閨勞寄詩未暇敦伉儷古來南流者

多在夜郎地開元供奉後近代文成繼同為放逐臣公也更
迢遞坎壈幾十秋屈指不堪計我來瞻舊祠憑弔煙雲際深
徑游麋鹿短墻纏薜荔灑掃勤老僧伏臘土人祭戎馬昔縱
橫爭戰無寧歲碧瓦金銀宮劫灰榛莽蔽棟宇獨無恙疑有
山靈衛延佇懷逞哲流風未衰替朗讀招魂篇白日欲西逝

夢歸故園作

我有一區宅遠在東海隅開扉臨碧水千頃鴛鴦湖舍之萬
里游三歲有六月比來鄉思深清夢亦超忽茫茫渡江漢瞬
息達故園岸傍花亂發彷彿對春溫入門但疾趨上堂拜吾
母懷探滇池蓮長跪為母壽母手持蓮花置之繡佛前粲然
顏色喜如彼麻姑仙病妾見我歸攬鏡整簪珥癡兒見我歸
抱書問奇字家人語未畢戾止平生親怪我風塵色仍是吹

簫人四坐盡擲揄一去不復顧覺後疑為真大笑世眼誤尼
父有遺訓富貴如雲浮內美苟無虧顛顛何足憂今也殊不
然結交重金帛吾鄉多素封對面九嶷隔因之遠行邁經年
別吳關願得卧舊廬夜夜夢中還

舍弟書來促予早還因寄此詩

我生既寡諧浩蕩誰羈束被褐辭衡門渺然越南服周覽歷
諸郡三見芳草綠跂望勾吳鄉繁憂亂心曲飛鴻隨青雲素
書在其足一尺桃花箋百行字盈幅期我早旋歸鵲鴿義誠
篤行旅非好勞豈不念松菊苟得全令質何妨淹征軸萬里
猶比鄰斯言可三復

雜感

客遊無定踪來此異鄉縣春往復秋來流光疾於電草木忽

萎黃搖落滿郊甸肅肅天始寒藏我白團扇憂來固無方豈
惟感物變美酒雖盈樽強酌不終宴

丈夫志四海桑麻非安宅天地猶彈丸胡爲悲遠客遠客未
足傷所嗟無樂方內顧迫婚嫁外處乏餼糧采菽聊爲餐斧
冰持作漿朝尋沮溺儔暮逐遊俠場浮沉且隨時遲遲謝塵
韉虛已以游世遺訓師蒙莊

束髮事詩書矢志慕管葛十年困蒿萊被服但裋褐出疆乘
耒耜行行望城闕第宅何縱橫高臺凌木末中有四方人挾
策競干謁連袂卽成帷驅車無停轍時俗尚吹竽我乃獨操
瑟同舍不相知邈若秦與越浸灌笑時雨爍火混明月慷慨
發長謠中情誰能察

少年慕繁華春服被輕綃方舟駕蘭漿置酒臨江臯環坐多

美人嫣然如二姚纖手白無瑕爲我奏瓊簫頽陽倏西逝歡
愛不終朝朱顏非昨日齒髮亦已凋娛樂且顛顛憂心况怵
怵人世苦混濁羨門寧可招安得彭涓術天上永逍遙

丹山三鳳鳥比翼棲梧桐羞與燕雀羣翩翩各西東相去萬
餘里飲啄難相從所食無琅玕毛羽猶未豐東顧夜郎道南
望羅浮峰悵恨歸來遲有母勞尸饗干祿爲親屈宿昔志願
同豈知乘風意至今悲道窮

有女若江妃獨立河水濱交贈白玉環謇修前致詞仲春冰
始泮桃李東風吹我馬玄以黃駕言忽西馳盈盈天漢水悵
望隔南箕烏鵲不爲梁何以成佳期盛年欲遲暮延佇心傷
悲

中天高太白烽火動邊城西戎爲我仇大將得專征兵事尚

神速部曲寂無聲白日隨原野但聞戰馬鳴况當十月交朔
氣凝旆旌角弓勁如石寶刀不可擊從軍雖云苦旦暮立功
名舍我舊逢掖望闕請長纓荷及力不及又恐負生平馬首
靡所託岐路空屏營

羅浮有仙人遺我龍葱幹裁之爲長笛律呂若條貫正響激
林表鳳凰鳴天半濮上盛弦歌新聲日靡曼聽者惑荒淫傾
耳動嗟嘆世俗多昏迷寧知我所患知音二三子迢遙隔雲
漢招之未能來孤立被衆訕愁思當訴誰鬱鬱處宵旦
渡水策青驪涉原操蒙衝少壯一失足垂老將焉從俠客舍
七首束手難樹功王孫泣岐路不如田舍翁狀貌若至愚俛
仰拙爲容邦族且相棄何況行路中朝詠伐木詩暮乃賦谷
風我無千黃金結交安得終

和龔蘅圃述懷

少壯事遠游破浪荆門西一出卽萬里吟竚誰扶攜不如舵
樓人得載青裙妻好事走鬼方輕生涉蠻溪直上苴蘭城滇
池濶無隄熨童歌采茶厥聲哀以淒蒙縱菜脆滑絕勝薩波
壑望帝苦思蜀鳴鑿多怨齊聽此懷鄉縣得得馳歸蹄再渡
洞庭水回顧妖氛迷戢羽巢故林鸞鳳化爲雞循陔藝香蘭
培以山中泥種水收雕胡閒殺春田犁樵漁卜新鄰桑柘非
舊畦一朝哭慈母感彼哀烏啼版輿不再御繡佛猶在閨總
帳照白相夜夜如然犀可憐手中杖削桐不削藜聊和述懷
作搗檠聯裝題

與朱西畯夜話次前韻

秦時鑿長水及仙山橫西丹井封古苔劬藥香鏡攜可憐十

年中兩悼蒙莊妻但有蓬頭兒撈蝦慣沿溪詩鄰得朱盜越人
呼狂謂盜舊闕沙爲隄痛哭十上書不第心淒淒牀頭三百甕祿
料惟酸壘約尋江南山追弔陳梁齊隋葉如珊瑚亂紅沒霜
蹄天闕我舊遊不怕樵徑迷高樓數落星廢埭聞鳴雞滑紙
裁澄心冷瓦磨澄泥互索酒邊句只憶壟上犁垂老歸未得
故園荒茶畦征馬嘶向人如聽巴猿啼久鰥客爲家無夢尋
空閨迢迢京華路往來同奔犀北裝又迎冬袖鞭拋杖藜歸
與徒羨君山信息恩題

與蔡遠士次前韻

君家茗水邊壤接由拳西爾母我從姑歸寧必相攜少長依
舅氏論姻得鴻妻因舍芙蓉國來住梅花溪與予小蓬門祇
隔薜蘿隄年時守鄉舍敗壁風淒淒有酒呼共飲白鹽糝黃

壘本非采蕨人顏槁如夷齊出門持饑鉢厭苦輪與蹄負米
空歸來形瘁心悲迷徒招庾域鶴不割茅容雞煩爾頻慰勞
屐齒衝苔泥執手話長策逞逞商畊犁結鄰茆三間各種瓜
滿畦開園收芋粟一救兒女啼燈火照夜織聲聲出寒閨旣
免凍餒憂肯慕腰金犀暇日約看山到處扶雙藜得句埽石
片名姓同鐫題

渡河有感次前韻

昨夜乘星槎直薄崑崙西尋源入天漢錦石懷中攜今朝渡
安瀾仰謝河鼓妻神功思夏后治瀆如治溪所貴善濬導豈
在堅防隄乃役萬柳夫椽杙聲何淒計口官給錢有飯無羹
壘縣帖紛捉逃南充連東齊鞭撻苦未息譬農驅牛蹄前年
遭大決淮北洪濤迷十室九漂沒不聞犬與雞蛟龍窟原田

安問畊拖犁蠲租詔頻下稍稍治菜畦河官又點行寧顧一
路啼要害成成壘縫旗勞征閨忽來大府騎紈扇蒙燕犀窮
者褐不完凍坐焚枯藜哀此中華民顏面同雕題

渡江

朝出儀鳳門沿江行七里對面見羣峰舉鞭近可指到江認
煙鬟迢迢隔浦子官津樣大艚語喧綠潮裏載馬多於人人
坐舵樓底是日風正好橫渡帆索理船尾舊鷗羣船頭新沙
背須臾泊山城女牆楚如齒客舍在其下僕夫弛行李憶昔
漢沔歸勞勞行鞅止十載江湖踪倣裝復來此我衰非昔顏
那堪照江水

寄田紫綸學使

憶昔舍畊墾買蹇走畿縣賤稱刺草臣禮伉直廬彥被褐但

相訪必拂賓席見鄰巷曹謝輩

謂實菴舍人方山員外

往往同清讌揮

觥索賦詩割楮滑於絹脫帽散醉髮亦捺禿穎戰君作何粲
然如五金出鍊蓋法韓吏部編韋屢截弗長句勢卓蹕短律
色葱蒨不待東野聯獨詠霎成卷燒曹譜宮羽恨少絕世媛
錦製囊挈歸把誦伴釣線三載卧菰蘆省郎夢中面今除學
省官袖剩鷄舌片聞別都城時簪紱空國餞嚴裝唯籤騰車
重百驢牽此外鮮長物導騎不帶箭署對良常山邑吏早除
墀江左本才地幅員最寬行多士志科名故以技自銜單門
而窮經累失書升薦更有至皓首不一青領緣無怪厭酸齏
翻慕漁與佃藉非賢主司波靡詎能轉君來矢至公約法小
胥繕芹堂萬弟子相告手為拊下客寓石頭濡裳采菱鈿秋
嶺楓葉底望見雙旗茜行將謁三茅捉轡鞭紫燕便擬褰朱

惟揆睫窺著撰願言發歌嘏搯縵奉游宴

龔方伯置酒墨稼軒時陳獨醉藍謝青初從鄉門至署
醉後同蘅圃賦

客從家江來石城繫舴艋主人鑱印牀解榻埽行省小春暖
到樹拓牖見桃杏况復黃朶鮮老香撲衣領巡檐日纔隨照
席燭已秉薑紫調霜蟹菜綠卷水麩南烹庖隸解丰味類鄉
井密坐皆飲仙量可百楠瘦飛籌無停盞入手不教冷顧我
無麴腸心懾酒律猛沈酒浣錦茵風帽欹詎整喧雞醒醉耳
戶外曉星耿儵忽海霧收砂丸吐遙嶺出郭盡游地舉目饒
詩境官槽多紅鴛曷不聯轡騁

贈正聞和尚

金粟大弟子朗澈塵外姿夙悟頓漸理象教推總持游覽愛

名勝躡屩登武夷瘦筇挂雨笠天半雲相隨前年經戎馬杯
渡江之濬東園遠人境規地築茆茨編籬護丈室引泉鑿方
池容膝已可安何用廣廈爲佛席焚薰陸趺坐蒲團宜足跡
不越戶毋乃津梁疲我來暫結鄰相望隔町畦時偕宗雷輩
茶瓜話遲遲石聽生公法篋滿湯休詩香風動林杪叢桂方
紛披

寄趙恒夫權關廣陵

繁華廣陵城設權截江滸里道天下中南北接檣櫓星郎主
計臺百廢得具舉惟彼山澤利王政行自古菽粟布帛絲齒
革角毛羽薄徵按稅書廉不溢銖黍津吏橫索錢有罰必夏
楚下車未數旬萬頌喧羣估公暇愛長吟灑翰捷如雨孔坐
合文人鄭驛拉仙侶移舫小秦淮時作平山主垂楊隱紅旗

飛花點青組勝事續醉翁珠歌間雪舞顧我客石頭挈艇期
屢阻忽忽歲已周層冰膠斷浦挂夢竹西亭得句缶頻拊聞
將出鈴齋報最達少府北轅如未駕行當奉揮塵茗南倘暫
歸廣廈昔曾處願泛白蘋洲重翻舊簫譜肯以尺翰招蘭世
星夜鼓

朱不為紫薇軒偶集

今朝天氣佳灑然越塵市間人相與俱緩屨不踰里倚樹聽
啼鶯一日三四徙東鄰訪故交幽居面流水十畝桑柘深綠
映柴門裏軒窗為我開書帙富盈几海棠發已謝芍藥尚含
蕊吾師欠菴先生昔手植石壇鬪紅紫玉餅瀉如澗飲必命弟子
舍瑟春風中言許狂者是逝波感今昔六載一彈指遺編付
後賢承家賴有爾平生愛良友盤餐出花底雅集逼新詠分

題授側理謂詩能窮人一任譽與毀浮雲視軒冕不以彼易
此銅壺三漏下傳觴猶未止茲游既盡歡吾儕可歸矣

花南老屋詩集卷一終



